

武林往哲遺著

于肅愍公集卷之六

五言絕句五十三首

惜春

無計留春住從教去復來明年花更好只是老相催

春曉

晝靜暝風微簾垂客到稀畫梁雙燕子不敢傍人飛

落花

春來又春去花落復花開老少尋常事何須廢酒杯

暮春

槐柳拂雲長清陰覆短牆羣芳俱落盡祇有菜花黃

小樓卽景

樓外青山好樓前綠樹多欄杆知幾曲曲曲費吟哦

偶題三首

日落風欲靜鳥噤人自閒白雲如解事成雨便歸山
倦鳥投林處斜陽在樹枝薄雲收未盡山雨乍晴時
薰風何處來吹我庭前樹噤鳥愛繁陰飛來不飛去

夏景

簾捲東風動庭空白日長可憐雙蛺蝶猶戀菜花黃

喜雨

雨洗乾坤淨恩霑品物新俯觀寰海內無復皺眉人

日暮

歸鴉爭遶樹落日半銜山微雨晚來歇孤雲獨自還

舟中

逆道疲鞍馬舟行得暫閒推篷看風景祇見太行山

秋閨

深閨夜勝年刀尺如冰冷縫紉不成眠轆轤響金井

秋意

池上秋風起池中秋水涼芙蓉好顏色可惜不禁霜

春日散步庭下偶題二首

雨過苔痕淨庭空日影遲好懷誰會得曉鳥在花枝
春暖草如織天晴花欲燃韶光誰買得滿地是榆錢

春夜

長風送華月照我庭前樹宿鳥忽驚飛雙雙背人去

清明日戲題

纔看花滿枝又見花零落春光不自留莫怪東風惡
清源分司林檎去時始見開花自平陽還則結實
久矣因成二十字

去時樹開花來時花結子如何馬上人來往只如此
夏日晚景

浮雲含雨意斜日弄波光暮景難留戀誰言白晝長
紀夢中作

判袂不辭難出門山更山來年二三月竚聽凱歌還
并州北門城樓

塞北窮冬候無風也自寒樓高窺朔漠無事莫憑欄

凍鵲

獨占高枝立天寒儔侶稀明朝春意動好向上林飛

獨坐

焚香坐一室馳心向萬里有官修其職展轉安得已

見新月感懷

新月似銀鉤彎彎掛客愁相思萬里外薄暮倚層樓

和高僉憲雜詠

手捫水中月誤觸清虛殿竊藥歸掌中祇恐姮娥見

暮景

怪底東風惡寒威透塞衣捲簾雲接地撩亂雪花飛

春寒

遠山猶帶雪淺水未生波花柳無消息春寒可奈何
除夜宿太原寒甚

寄語天涯客清寒底用愁春風來不遠只在屋東頭
春日客懷二首

馬上春如夢空嗟歲月長天涯無限路芳草自斜陽
莫把層樓倚樓高接遠天東風鄉國路直在白雲邊
春日登樓

柳條如翠綫萬縷織春愁遮斷東風路無緣入畫樓
春思

春色二分過花枝一半開天涯芳草遍游子幾時回

膽瓶梅

數點枝頭雪分明露化工恐教塵土污移入玉壺中

晚景

斜日映高樹輕風捲細波夷猶興不盡其奈晚來何

七夕二首

亡妻
忌辰

夜靜銀河冷天高玉露清雙星緣底事千古若爲情
華月窗閒過涼風扇底生撫時追往事幽恨不分明

挽唐進士母

持身不失節教子已成名借問生前事閨門玉雪清

送趙參議之浙江

楓宸初拜命浙省已馳名到任君應喜西湖徹底清

題雪梅圖送顧博士

地上三尺雪枝頭一點春那將歲寒意模寫贈行人
秋意

溽暑隨風散嫩涼趁雨生蕭蕭樹頭葉且解作秋聲

題金壁山水二首

溪山疏雨歇水木散清陰樵唱知何處白雲深更深
花發東風軟鳥嘯春晝閒抱琴出門去隨意看青山
無相偈

衆人不識空人我無礙障畢竟我本無何處更求相
古意

瑤階步月華衣振涼風發零落亦多情盈盈透羅幃
秋闈二首

散步瑤階下庭空不見人回頭顧明月惟有影隨身
莫向池邊去芙蓉花正開近來憔悴甚因是被風猜

從軍五更轉

一更新月出城上箭初傳將軍號令急不敢倒頭眠
二更天氣冷孤月照三軍誰奏胡笳曲淒涼不忍聞
三更霜漸落城上聽寒雞仰面看星象天空北斗低
四更城上望滿野是新霜衣薄弓刀冷那能不憶鄉
五更人盡起鼓角動邊城聞道將軍令平胡要起營

圓明偈

明月無罣礙皎然在虛空恒河沙世界照耀一般同

七言絕句八十七首

豫讓橋懷古

豫讓橋邊策馬過當年意氣未消磨人臣報主宜如此
死不成功可奈何

平陽道中

楊柳陰濃水鳥啼豆花初放麥苗齊相逢盡道今年好
四月平陽米價低

列石挽竇鳴犢

列國難逢世主賢孤忠非命亦堪憐臨河不返宣尼轍
未必聲名萬古傳

曉發太原

鳴騶擁道出邊城月淡星疏騎火明驛路經行三十里

漏聲猶自報殘更

過汜水觀曾典史所種樹感懷

化洽民心久未忘路傍嘉樹比甘棠
我來憩馬清陰下
淚灑薰風一斷腸

過滎陽

鴻溝迢遞接滎陽芳草瀾漫古戰場
說盡興亡無限事
數聲嘯鳥在垂楊

過汜水

清汜垂虹貫濁流峻關虎踞瞰中州
山河不盡登臨興
兩袖春風獨倚樓

橫望巡檢司

在太行之中

獨倚危樓拭遠眸
青山環合白雲浮
孤標中斷分南北
半是覃懷半澤州

讀王荊公趙清獻公文集

新法殃民衆欲除
金陵強辨意何如
等閒一語鋒鋦折
稷契當年豈讀書

暮春遇雨

暖風吹雨浥輕塵
滿地飛花斷送春
莫上高樓凝望眼
天涯芳草正愁人

村舍桃花

野水縈紆石徑斜
華門蓬戶兩三家
短牆不解遮春意
露出緋桃半樹花

夜坐

朦朦淡月映窗紗坐聽嚴城動鼓笳自是歸期難準信
生憎銀燭又開花

題孟浩然踏雪尋梅

□□風雪路岐斜杖履行尋賣酒家萬里溪山同一色
□□□處是梅花

□□作

□□□□紫雲車天上歸來月欲斜吹斷玉笙人去遠
□□□□碧桃花

□□宿太原寒甚

□□陽和及蚤來何須隄柳與江梅五更月落天雞唱

更有城頭畫角催

元日寓太原分司獨坐感懷

客中況味似枯禪歲月無情任轉遷不是五更聞爆竹
那知今日是新年

太原縣元日卽事

青袍縣吏候庭參慶罷新正酒半酣不道并州倦遊客
夢回枕上憶江南

憑闌

晚晴公館有餘閒獨上危樓望遠山散盡白雲收盡雨
歸雅背得夕陽還

廟燈花鵲噪

鵲噪燈花亦偶然此間喜信只虛傳
朝朝暮暮知多少誤卻歸期又隔年

小樓春望

小樓十二曲闌干曲曲闌干見遠山
望盡夕陽芳草色天涯遊子幾時還

殘春漫書

借問春歸何處所天涯芳草路茫茫
楊花不解留春住空逐東風上下狂

讀參同契有感

蓬島瀛洲事渺茫嬰兒姹女竟分張
仙凡自古雲泥隔空讀人間不死方

宋宮

□□高處彩雲飛
艮岳纔成事已非
寂寂長門金鎖合
□□無復二龍歸

七夕

鵲橋千丈跨銀河
夜靜風恬水不波
牛女相逢又相失
歡情不似別情多

雁字

界破青天印碧波
分明點畫與波戈
右軍不識其中意
卻把黃庭換白鵝

雨中山行

溼雲拖雨過前山
遠樹冥冥煙霧間
碎石亂流人不渡